

# Pesta Ubin 2022

Pesta Ubin kembali dengan meriah pada tahun ini dari 4 hingga 25 Jun 2022! Disokong oleh NParks dan Friends of Ubin Network (FUN), sambutan selama sebulan ini melibatkan 22 aktiviti anjuran 15 buah kumpulan yang terdiri daripada 120 orang sukarelawan dengan lebih 640 orang peserta mengambil bahagian dalam aktiviti tahun ini.

Dalam permainan goli panjang, pemain cuba mengetuk goli lawan keluar dari bulatan untuk mengambilnya. Pemain yang dapat mengambil paling banyak goli ialah pemenangnya.

Pesta Ubin 2022 juga menyaksikan kembalinya pelbagai aktiviti menarik yang diadakan di kawasan luar. Para peserta menikmati permainan kampung seperti gasing, goli panjang, teng-teng dan chaptah. Mereka juga mengalami sendiri warisan kehidupan Ubin melalui lawatan dan kembara masyarakat, serta menghadiri pameran dan perjalanan berpandu yang menampilkan kekayaan biodiversiti Ubin. Bagi para penganjur, ini merupakan peluang yang dinantikan untuk akhirnya dapat bertemu secara bersemuka melalui Pesta Ubin.

Pesta Ubin berakhir dengan Hari Ubin yang berlangsung pada 25 Jun 2022. Tetamu Kehormat, Menteri Kebudayaan, Masyarakat dan Belia, Edwin Tong, mengumumkan beberapa inisiatif penduduk bagi manfaat para penduduk kampung di pulau tersebut. Ini termasuk butang amaran peribadi untuk warga emas, meluaskan grid kuasa suria yang kini membekalkan 90% keperluan elektrik di kampung utama, serta menyediakan kemudahan memadam api seperti pili bomba dan gelung hos. Menteri juga mengumumkan kejayaan usaha pemulihan spesies dan peningkatan habitat di Pulau Ubin, termasuk kejayaan burung Pemakan Lebah Tekak Biru (Blue-throated Bee-eater) untuk bersarang di pulau ini dan pembiakan Itik Bersiul Kecil (Lesser Whistling Duck) yang pertama di pulau ini didokumenkan.



Para peserta bergambar di hadapan sebuah rumah semasa lawatan berpandu di sekitar kampung Melayu



Sukarelawan dari Young Nautilus memperkenalkan kepada orang ramai pelbagai jenis biodiversiti marin yang boleh ditemui di Chek Jawa

Menteri Pembangunan Negara, Desmond Lee juga menemani Menteri Edwin Tong melawat pulau ini. Semasa lawatan, mereka mengambil kesempatan untuk menanam 50 batang pokok bersama masyarakat sebagai sebahagian daripada Pergerakan Menanam Sejuta Pokok, melawat Ah Ma, pemilik Gerai Minuman Ah Ma di rumah dan gerainya, serta bersiar-siar sambil menikmati pemandangan di sekitar Paya Chek Jawa.

Sungguh menginspirasi apabila melihat semua orang bersemangat untuk menyumbang kepada kemeriahan Pesta Ubin, yang merupakan petanda baik bagi edisi festival akan datang!



Hari Ubin 2022, diserikan oleh Menteri Desmond Lee dan Tetamu Kehormat Menteri Edwin Tong



Keluarga berseronok sambil mengeratkan hubungan antara satu sama lain sambil memerhatikan hidupan liar yang keluar dalam kegelapan malam

# Ubin Tales



## Bengkel Warisan Budaya dan Alam Semula Jadi di Pulau Ubin

Pada bulan Disember 2021, Lembaga Taman Negara (NParks) telah menganjurkan bengkel yang dipimpin oleh Better Trails dan Wheelz Future untuk mempamerkan warisan budaya dan alam semula jadi Pulau Ubin. Berikut kami kongsi intisari semasa bengkel tersebut.

### Bengkel Warisan Alam Semula Jadi "Colouring the Coasts of Chek Jawa".

Hari bermula dengan para peserta bengkel "Colouring the Coasts of Chek Jawa" tiba di Terminal Feri Changi Point untuk bertemu fasilitator dari Better Trails. Bagi kebanyakan mereka, ini merupakan kali pertama mereka menaiki bumbot! Menikmati sinar matahari dan bayu laut, peserta kemudiannya tiba di Pulau Ubin dan memulakan perjalanan dengan lawatan ke Paya Chek Jawa untuk mengetahui tentang kisah pemuliharaan dan kekayaan biodiversitinya yang sangat menginspirasi.

Untuk mengakhiri lawatan berpandu ini, para peserta mengekspresikan pengalaman jejak warisan mereka di Paya Chek Jawa dengan berlukis bersama keluarga di bawah bimbingan fasilitator yang turut berkongsi teknik lukisan baru menggunakan bahan tidak konvensional, seperti span dan garpu.



(Kiri) Seorang peserta "colouring the coasts of Chek Jawa" dengan span; (Kanan) Kanak-kanak juga melukiskan pengalaman mereka di Tanah Paya Chek Jawa

### Bengkel Warisan Budaya "Hidden Treasure"

Pada petang yang sama, Wheelz Future mengendalikan bengkel kedua, "Hidden Treasure", untuk kumpulan peserta baru. Para fasilitator membawa para peserta berbasikal mengelilingi Pulau Ubin untuk mencari khazanah sejarah dan budayanya.



Peserta belajar cara memetakan mercu tanda di Pulau Ubin

Semasa bengkel tersebut, para peserta melawat Makmal Kehidupan Ubin, dan di situ mereka mempelajari tentang fakta sejarah berkaitan Pulau Ubin. Peserta juga memulakan aktiviti berkumpul untuk mencari beberapa mercu tanda ikonik pada peta Pulau Ubin, dan melawat Gerai Minuman Ah Ma dan Bukit Puaka, puncak tertinggi di Pulau Ubin.

Bengkel ini mendapat maklum balas yang positif daripada para peserta. Para peserta juga tidak sabar untuk menyertai bengkel akan datang, seperti "The Mangrove Art Story", "A Diorama of Ubin's Protected Species" dan "My Ubin Sketch".

Ingin sertai bengkel kami dan mengetahui lebih lanjut tentang Pulau Ubin? Nantikannya di [Halaman Acara dan Aktiviti NParks!](#)



Peserta melawat Gerai Minuman Ah Ma



Imbas kod QR ini untuk mengetahui lebih lanjut tentang bengkel akan datang di Pulau Ubin!



Share your love for nature and animals at #NParksBuzz #AnimalBuzzSG



# Mempertingkatkan Habitat Kita dengan One Million Trees

Pergerakan Menanam Sejuta Pokok (OMT) menyasarkan untuk menanam sejuta lagi pokok di serata Singapura menjelang 2030. Sebagai sebahagian daripada usaha NParks untuk mencapai visi Bandar dalam Alam Semula Jadi (City in Nature) kita, usaha penanaman ini bukan sahaja memulihkan alam semula jadi dalam bandar kita, tetapi juga mendekatkan rakyat kepada alam semula jadi melalui penanaman oleh masyarakat.



Penanaman OMT oleh Creative O Preschoolers' Bay di Coastal Arboretum

Pada masa ini, usaha penghutan semula dan program peningkatan habitat sedang dijalankan di Pulau Ubin yang akan menyaksikan kira-kira 30,000 pokok daripada lebih 200 spesies asli akan ditanam dari tahun 2020 hingga 2030 sebagai menyokong gerakan OMT.

Pada tahun 2022, lebih 3,000 pokok daripada lebih 200 spesies akan ditanam di 12 tapak di Pulau Ubin. Pokok-pokok ini termasuk Buah Pala Berdaun Kecil (*Knema corticosa*), Dungun (*Heritiera littoralis*), dan Chengal (*Neobalanocarpus heimii*). Kebanyakan acara penanaman pokok ini ialah sebahagian daripada usaha penghutan semula untuk mempertingkatkan keterhubungan dan keluasan habitat hutan di pulau ini.

## Penglibatan Masyarakat

Melibatkan masyarakat ialah kunci kejayaan gerakan OMT. Sejak tahun 2020, Pulau Ubin telah mengalukan sumbangan daripada lebih 20 kumpulan masyarakat ke arah usaha untuk masa hadapan yang lebih hijau.



Menteri Edwin Tong (kiri) dan Menteri Desmond Lee (kanan) menyiram pokok yang mereka tanam semasa Hari Ubin 2022

## Habitat untuk Hidupan Liar

Dipantau secara kerap oleh NParks, pokok-pokok yang ditanam di bawah OMT menyediakan habitat baru serta mewujudkan keterhubungan antara kawasan hutan yang berlainan.

Kawasan yang dijadikan hutan semula ini telah membolehkan hidupan liar asli kita merentasi tompokan hutan untuk mencari makanan atau pasangan dengan selamat, dan menikmati habitat hutan yang lebih besar. Berikut ialah beberapa haiwan hebat yang dapat dirakamkan semasa pemantauan penghutan semula!

Kakitangan dan sukarelawan NParks melakukan pemantauan penghutan semula (Kredit gambar: Jack Yam)

Mamalia yang sukar ditemui, Napuh (*Tragulus napu*) ini merupakan satu-satunya spesies kancil yang ditemui di Pulau Ubin. Haiwan ini telah dikesan di kawasan semak di tapak penghutan semula di sekitar pulau ini. Napuh lazimnya tidak ditemui di kawasan lapang, jadi gerakan OMT membantu untuk memulihkan perlindungan berbentuk kanopi, yang akan membolehkan Napuh ini bergerak dengan mudah dan diharapkan dapat memulihkan bilangan populasi mereka.



Napuh (Greater Mousedeer) (Kredit gambar: Mohamad Azlin bin Sani)



Murai Batu Ekor Putih (White-rumped Shama) (Kredit gambar: Joseph Lin)

Murai Batu Ekor Putih (*Copsychus malabaricus*) ialah burung cantik yang pandai bernyanyi dengan siulan yang merdu. Burung ini kini sering dilihat di Pulau Ubin disebabkan oleh keterhubungan yang lebih baik antara tompokan hutan daripada usaha penghutan semula untuk menghubungkan habitat mereka.



Musang (Sumatran Palm Civet) (Kredit gambar: Robert Teo)

Sering ditemui di kawasan penghutan semula, Musang (*Paradoxurus musangus*) merupakan haiwan omnivor malam yang memakan mangsa kecil dan buah-buahan. Musang juga menyediakan khidmat ekosistem yang penting sebagai penyebar tumbuhan-tumbuhan, dengan menyebarkan biji daripada buah-buahan yang dimakannya ke serata kawasan tempat haiwan ini mencari makanan.



## Sertai Gerakan OMT

Jika anda ingin menyumbang kepada Bandar dalam Alam Semula Jadi kami sambil meluangkan masa secara bermakna bersama rakan-rakan dan keluarga anda, nantikan peluang penanaman pokok di Pulau Ubin atau di tanah besar Singapura dengan mengimbas kod QR di bawah!

Imbas untuk mengetahui tentang Pergerakan Menanam Sejuta Pokok

